



Munro Leaf

Ferdinandu

In tempu d'una volta
ci era in Spagna...

...un giovanu torru
chì si chiamava Ferdinandu.

Puntendu si di capu
tutti l'altri torri allevati cun ellu
currianu è saltavanu
tutta a santa ghjurnata

Ma micca Ferdinandu.

Li piacia à esse pusatu chetamente
è à muscà u prufume di i fiori

In lu pasculu,
avia una piazza prediletta :
sottu à una suvera.

À u frescu di quellu arburu,
li piacia à gode si a ghjurnata
atturniatu da u prufume
di i fiori.

A mamma, chì era una vacca,
di quandu in quandu
purtava u penseru per ellu.
Temia chì a solitudine
li sia penosa.

« Cumu hè chì t'ùn corri
cun l'altri giovani torri ?
Cumu hè chì t'ùn ghjochi micca ?
Cumu hè ch'ùn t'imbaruffi cun l'altri ? »
dumandava a mamma.

Ma Ferdinandu scapacciava :
« Mi piace di più à stà quì,
pusatu chetamente è rispirà
u muscu di i fiori. »

A mamma vedia
ch'ellu ùn s'annojava solu,
è cum'ella era
una mamma cumprensiva
- ben ch'ella ùn fussi chè una vacca -
u lacava in pace,
ch'ellu si campi.

L'anni passonu
è Ferdinandu ingrandava
è diventò tamantu
è scupignu.

Tutti l'altri torri
ch'eranu ingrandati cun ellu
in u listessu pasculu
s'imbaruffavanu a ghjurnata sana.

A si luttavanu
cornà à corna.

Ciò ch'elli bramavanu,
era d'esse scelti
per participà à e corse
di i torri in Madrid.

Ma micca Ferdinandu.
Li piacia sempre
à esse pusatu chetamente
sottu à a suvera
atturniatu da u prufume
di i fiori.

Un ghjornu ghjunsenu cinque omi,
incalfati di cappelli
da ride si ne.

Venianu à sceglie
pè e corridi di Madrid

u più maiò, u più rapidu
è u più salvaticu
di i torri.

Tutti l'altri torri currianu,
suffiendu è catapughjendusi,
saltendu è fendo a sbacca.
Ognunu credia chì l'omi
l'avianu da sceglie
perchè ch'ellu era u più forte
è u più tremendu.

Ferdinandu, ellu,
sapia per sicuru
ch'omu ùn lu sceglierrebbe micca
è n'avia poca primura.

Si n'andò, cum'è di solitu,
vicinu à a suvera.

Pensendu di pusassi
in l'erba liscia è fresca,
si pusò nantu à un bufone.

Sì tù füssi un bufone
è ch'un torru ti sì calassi addossu
chì feresti ?
U punghjeresti.
Hè ciò ch'ellu fece
u bufone.

Ohi ! Sente !
Ferdinandu schiglia un saltu.
Cum'è spiritatu,
core in lu pratu,
soffia, erpia è zambra.

Hè cusì
chì i cinque omi u vissenu
è s'intusiasmonu.

« Eccu u più grande,
u più terrorizante di tutti i torri ».

Appuntu ciò chì li ci vulia
per e corrida di Madrid.

Allora u si purtonu
nantu à un carru
à l'arene.

Era un ghjornu signalatu !
E bandere schjaffittavanu,
orchestri sunavanu...

... è tutte e belle signore
avianu fiori in li capelli.

In l'arena,
a sfilata cuminciò.

In prima,
affacavanu i banderilleros
purtendu zimbronni infiucchittati
ch'elli ficcherebbenu
in tupezzu di u torru
pè azzizzà lu
è arrabbià lu.

Dopu
venianu i picadors
nantu à i so cavalli magri.

Eranu armati
di lancia longhe
chì ne zingherebbenu u torru
pè arrabbià lu
ancu di più.

In fine,
u matador,
u più fieru di tutti.

Mustrava a so superbia
è s'inchinava di nanzu à e signore.

Avia una cappa rossa
è una spada chì li ghjuverebbe
à tumbà u torru.

Tandu ghjunse u torru,
è a sai qual'era ?

FERDINANDU

Omu u chjamava
Ferdinandu u Tremendu
è tutti i banderilleros
n'avianu a paura,
tutti i picadors n'avianu a paura
è u matador avia u telu à l'osse.

Ferdinandu
corse ver dì u mezu di l'arena
è u publicu li fece festa
è sciaccamanò.
Tutti pensavanu
ch'ellu avia da cumbatte
accanitu, suffiendu da i nari
è sciacchendu curnate furibonde.

Ma micca Ferdinandu.
Quand'ellu fù à mezu à l'arena,
visse fiori in li capelli
di tutte e belle signore ;
tandu si pusò calmu calmu,
è annasò i so prufumi.

Mancu s'avia da batte
è fà l'innarteriato.
Simplicemente s'era pusatu
da muscà u prufume di i fiori.

I banderilleros eranu in le furie,
i picadors ancu di più in le furie
è u matador era tantu in le furie
ch'ellu ne pienghjia da a rabbia
chì ùn si pudia dà
di cappa è di spada.

Tandu
Ferdinandu fù turnatu
in casa soia.

È,
à sente l'ultime nove,
hè sempre à pusà custì
sottu à a so suvera,
rispirendu calmu calmu
u prufume di i fiori.

Ma sebbiatus ch'ellu hè !